

গণপ্রজাতন্ত্রী বাংলাদেশে সরকার
তথ্য অধিদফতরি
বাংলাদেশে সচিবালয়
ঢাকা।

সংবাদ গতিধারা

ঢাকা, রোববার ১৫ নভেম্বর ২০১৫, ১ অগ্রহায়ণ ১৪২২

আজকের দৈনিক পত্রিকাগুলো নিম্নলিখিত বিষয়গুলোকে প্রাধান্য দিয়ে খবর ছেপেছে :

- ১। সিরিজ হামলায় রক্তাক্ত প্যারিস : রাষ্ট্রপতি ও প্রধানমন্ত্রীর নিন্দা, শোক
- প্যারিসে বাংলাদেশ দূতাবাসে হটলাইন চালু
- ২। সারা দেশকে রেলওয়ে নেটওয়ার্কে আনা হবে : প্রধানমন্ত্রী
- ৩। সাত খুনে জড়িত থাকলে শামীম ওসমানকেও ছাড় নয় : স্বরাষ্ট্রমন্ত্রী
- ৪। বাংলাদেশ উন্নয়ন ফোরাম বৈঠক আজ ঢাকায় শুরু
- ৫। তথ্য-প্রযুক্তি খাতে বাংলাদেশ পাবে ৩শ' কোটি টাকা
: লন্ডনে ই-কমার্স ফেয়ারে চার প্রতিষ্ঠানের সাথে বাংলাদেশ হাইটেক পার্কের চুক্তি
- ৬। ব্যাংকগুলোকে দীর্ঘমেয়াদী বিনিয়োগের আহ্বান গভর্নরের
- ৭। বিদ্যুৎ ব্যবস্থার উন্নয়নে বাড়তি ঋণ অনুমোদন বিশ্বব্যাংকের
- ৮। বিভিন্ন কর্মসূচির মধ্য দিয়ে ডায়াবেটিস দিবস পালন
- ৯। সারাদেশে শিশুদের খাওয়ানো হল ভিটামিন 'এ' প্লাস ক্যাপসুল
- ১০। নির্বাচনী সমস্যার শান্তিপূর্ণ সমাধানে পাশে থাকবে যুক্তরাষ্ট্র : মার্কিন রাষ্ট্রদূত

১। সিরিজ হামলায় রক্তাক্ত প্যারিস : রাষ্ট্রপতি ও প্রধানমন্ত্রীর নিন্দা, শোক

- প্যারিসে বাংলাদেশ দূতাবাসে হটলাইন চালু

ছয় দফা সন্ত্রাসী হামলায় কাঁপল প্যারিস। গত ১৩ নভেম্বর শুক্রবার রাতের এই হামলায় ১২৯ জন নিহত এবং ৩৫০ জনের বেশি আহত হয়েছে বলে ফরাসী কর্তৃপক্ষ জানিয়েছে। আহতদের মধ্যে ৮০ জনের অবস্থা আশঙ্কাজনক বলে জানা গেছে। ফ্রান্সের রাজধানী প্যারিসে সন্ত্রাসী হামলায় ব্যাপক প্রাণহানির ঘটনায় শোক জানিয়েছেন রাষ্ট্রপতি মো. আবদুল হামিদ ও প্রধানমন্ত্রী শেখ হাসিনা। তাঁরা এ ধরনের সন্ত্রাসী কার্যক্রমের তীব্র নিন্দা জানানোর পাশাপাশি ফ্রান্সের সরকার ও জনগণের প্রতি সংহতি জানিয়েছেন। সূত্র-জনকণ্ঠ, প্রথম আলো, ইত্তেফাক, ডেইলি স্টার, ইন্ডিপেনডেন্ট, ডেইলি সানসহ অধিকাংশ দৈনিক এ বিষয়ে লিড নিউজ ছেপেছে।

ফ্রান্সে ভয়াবহ হামলার ঘটনায় প্যারিসে বাংলাদেশ দূতাবাসের হটলাইন চালু করা হয়েছে। সেখানে বসবাসরত বাংলাদেশি নাগরিকদের জরুরি প্রয়োজনে দূতাবাসে যোগাযোগ করতে বলা হয়েছে। গতকাল ১৪ নভেম্বর শনিবার ঢাকার পররাষ্ট্র মন্ত্রণালয় এক বিজ্ঞপ্তিতে এ তথ্য জানায়। ফ্রান্সে বাংলাদেশের রাষ্ট্রদূত শহীদুল ইসলাম গতকাল ১৪ নভেম্বর শনিবার সংবাদ মাধ্যমকে জানান, এখন পর্যন্ত বাংলাদেশি নাগরিকদের সবাই নিরাপদে আছেন। কেউ হতাহত হয়নি। সূত্র-জনকণ্ঠ (শেষ পৃ.,ক.৮), সংবাদ (পৃ.১,ক.৫), ইনকিলাব (পৃ.১,ক.৪), ডেইলি স্টার (পৃ.১,ক.৮), ইন্ডিপেনডেন্ট (শেষ পৃ.,ক.৭)।

২। সারা দেশকে রেলওয়ে নেটওয়ার্কে আনা হবে : প্রধানমন্ত্রী

প্রধানমন্ত্রী শেখ হাসিনা বলেছেন, তাঁর সরকার যোগাযোগ ব্যবস্থার আরও উন্নয়নে পুরো দেশকে রেলওয়ে নেটওয়ার্কে অধীনে নিয়ে আসার উদ্যোগ নিয়েছে। তিনি বলেন, আমরা সড়ক ও নৌপথের পাশাপাশি রেলপথে আরও বেশি পণ্য পরিবহণ করতে চাই। তাই রেল খাতের উন্নয়ন আধুনিকায়নে গুরুত্ব দিচ্ছি। এশিয়ান ইনফ্রাস্ট্রাকচার ইনভেস্টমেন্ট ব্যাংকের (এআইআইবি) প্রেসিডেন্ট জিন লিকুন গতকাল ১৪ নভেম্বর শনিবার গণভবনে সাক্ষাৎ করতে গেলে প্রধানমন্ত্রী শেখ হাসিনা এ কথা বলেন। সূত্র-যুগান্তর (পৃ.২,ক.১), প্রথম আলো (পৃ.২,ক.২), সংবাদ (শেষ পৃ.,ক.৪), নিউজ টুডে (শেষ পৃ.,ক.২), ইন্ডিপেনডেন্ট (পৃ.২,ক.৭)।

৩। সাত খুনে জড়িত থাকলে শামীম ওসমানকেও ছাড় নয় : স্বরাষ্ট্রমন্ত্রী

নারায়ণগঞ্জের সাত খুনে সেখানকার প্রভাবশালী আওয়ামী লীগ নেতা শামীম ওসমান যদি জড়িত থাকেন তাকেও কোনো প্রকার ছাড় দেওয়া হবে না বলে জানিয়েছেন স্বরাষ্ট্রমন্ত্রী আসাদুজ্জামান খান কামাল। গতকাল ১৪ নভেম্বর শনিবার রাজধানীর বিজ্ঞান ও শিল্প গবেষণাগার মিলনায়তনে এক অনুষ্ঠানে সাংবাদিকদের প্রশ্নের জবাবে এ কথা জানান স্বরাষ্ট্রমন্ত্রী। সূত্র-জনকণ্ঠ (পৃ.১৯,ক.১), ভোরের কাগজ (পৃ.১,ক.৬), যুগান্তর (শেষ পৃ.,ক.৭), ডেইলি স্টার (শেষ পৃ.,ক.৭), ইন্ডিপেনডেন্ট (শেষ পৃ.,ক.২)।

৪। বাংলাদেশ উন্নয়ন ফোরাম বৈঠক আজ ঢাকায় শুরু

টেকসই উন্নয়নের লক্ষ্যমাত্রা বাস্তবায়ন অর্থায়নের প্রয়োজনীয়তা উন্নয়ন সহযোগীদের সামনে তুলে ধরতে আজ ১৫ নভেম্বর রোববার থেকে ঢাকায় শুরু হচ্ছে বাংলাদেশ উন্নয়ন ফোরামের (বিডিএফ) বৈঠক। প্রধানমন্ত্রী শেখ হাসিনা শেরেবাংলা নগর বঙ্গবন্ধু আন্তর্জাতিক সম্মেলন কেন্দ্রে দুই দিনব্যাপী এ বৈঠকের উদ্বোধন করবেন বলে অর্থনৈতিক সম্পর্ক বিভাগের (ইআরডি) জ্যেষ্ঠ সচিব মোহাম্মদ মেজবাহউদ্দিন জানান। গতকাল ১৪ নভেম্বর শনিবার শেরেবাংলা নগরের এনইসি সম্মেলন কক্ষে বিডিএফ সম্মেলন নিয়ে এক সংবাদ সম্মেলনে এ তথ্য জানান তিনি। সূত্র-সংবাদ (শেষ পৃ.,ক.১), জনকণ্ঠ (শেষ পৃ.,ক.৪), যুগান্তর (শেষ পৃ.,ক.১), ডেইলি স্টার (শেষ পৃ.,ক.১), নিউজ টুডে (পৃ.১,ক.৫)।

৫। তথ্য-প্রযুক্তি খাতে বাংলাদেশ পাবে ৩শ' কোটি টাকা

: লন্ডনে ই-কর্মা স ফেয়ারে চার প্রতিষ্ঠানের সাথে বাংলাদেশ হাইটেক পার্কের চুক্তি

লন্ডনে ইউকে বাংলাদেশ ই-কর্মা স ফেয়ারের উদ্বোধনী দিনে গত ১৩ নভেম্বর শুক্রবার চারটি প্রতিষ্ঠানের সাথে বাংলাদেশ হাইটেক পার্ক অথোরিটির মোট ২ বিলিয়ন ডলারের বিনিয়োগ চুক্তি স্বাক্ষর হয়েছে। যুক্তরাজ্য ও সিঙ্গাপুরভিত্তিক মোট চারটি প্রতিষ্ঠান আগামী ৫ বছরে বাংলাদেশে তথ্য-প্রযুক্তি খাতে এই বিনিয়োগের ব্যাপারে আগ্রহ প্রকাশ করেন। বাণিজ্যমন্ত্রী তোফায়েল আহমেদ ও তথ্য-প্রযুক্তি প্রতিমন্ত্রী জুনায়েদ আহমেদ পলকের উপস্থিতিতে বাংলাদেশ সরকারের পক্ষে এই চুক্তিতে স্বাক্ষর করেন হাইটেক পার্কের ব্যবস্থাপনা পরিচালক হোসনে আরা বেগম। সূত্র-ইনকিলাব (পৃ.৩,ক.১), সংবাদ (পৃ.১৪,ক.১), ডেইলি সান বিজনেস (পৃ.১,ক.২)।

৬। ব্যাংকগুলোকে দীর্ঘমেয়াদী বিনিয়োগের আহ্বান গভর্নরের

উড়াল সেতু ব্রিজসহ বিভিন্ন দীর্ঘমেয়াদী প্রকল্পে ব্যাংকগুলোকে বিনিয়োগের আহ্বান জানিয়ে বাংলাদেশ ব্যাংকের গভর্নর ড. আতিউর রহমান বলেছেন, এজন্য দীর্ঘমেয়াদী সঞ্চয় স্কিম বাড়তে হবে। স্বল্পমেয়াদী সঞ্চয় দিয়ে দীর্ঘমেয়াদী বিনিয়োগ করাকে চ্যালেঞ্জিং উল্লেখ করে তিনি বলেন, এই চ্যালেঞ্জ মোকাবিলায় দীর্ঘমেয়াদী সঞ্চয় নিশ্চিত করতে হবে। গতকাল ১৪ নভেম্বর শনিবার রাজধানীর হোটেল রেডিসন ব্লুতে ‘ইন্টারন্যাশনাল সেমিনার অন ব্যাংকিং ইন বাংলাদেশ : দ্য লিপ ফরওয়ার্ড’ শীর্ষক সেমিনারে এ আহ্বান জানান গভর্নর। দেশি-বিদেশি ব্যাংকিং প্রফেশনালদের অংশগ্রহণে আয়োজিত দিনব্যাপী এ সেমিনারের আয়োজন করে অ্যাসোসিয়েশন অব ব্যাংকার্স বাংলাদেশ লিমিটেড (এবিবি)। সূত্র-জনকর্ষ (পৃ.১৮,ক.২), প্রথম আলো (পৃ.১৩,ক.৭), ইনকিলাব (শেষ পৃ.,ক.১), ডেইলি স্টার বিজনেস (পৃ.১,ক.৬), ডেইলি সান বিজনেস (পৃ.১,ক.১)। ফিনানশিয়াল এক্সপ্রেস এ বিষয়ে লিড নিউজ ছেপেছে।

৭। বিদ্যুৎ ব্যবস্থার উন্নয়নে বাড়তি ঋণ অনুমোদন বিশ্বব্যাংকের

বিদ্যুৎ বিতরণ ব্যবস্থার উন্নয়নে বাড়তি ১৭ কোটি ৭০ লাখ ডলার ঋণ অনুমোদন দিয়েছে বিশ্বব্যাংকের বোর্ড সভা। গতকাল ১৪ নভেম্বর শনিবার এক সংবাদ বিজ্ঞপ্তিতে এ তথ্য জানানো হয়েছে। ঢাকার নিকটে সিদ্ধিরগঞ্জ ৩৩৫ মেগাওয়াট কম্বাইন্ড সাইকেল বিদ্যুৎ কেন্দ্র প্রকল্পে বাড়তি ব্যয় করা হবে। সূত্র-ইত্তেফাক (পৃ.১৮,ক.৫), জনকর্ষ (পৃ.৩,ক.৬), সমকাল (পৃ.১৯,ক.১), ডেইলি সান বিজনেস (পৃ.১,ক.২), ফিনানশিয়াল এক্সপ্রেস (শেষ পৃ.,ক.১)।

৮। বিভিন্ন কর্মসূচির মধ্য দিয়ে ডায়াবেটিস দিবস পালন

বিশ্বের বিভিন্ন দেশের সাথে বাংলাদেশেও বিশ্ব ডায়াবেটিস দিবস পালিত হয়েছে। দিনটি উপলক্ষে রাজধানীসহ সারাদেশে বিভিন্ন কর্মসূচি পালন করা হয়। দিবসটির এবারের প্রতিপাদ্য ছিল ‘স্বাস্থ্যসম্মত খাবারই ডায়াবেটিস প্রতিরোধ ও নিয়ন্ত্রণের অন্যতম উপায়’। দিবসটি উপলক্ষে রাজধানীর বারডেম হাসপাতাল মিলনায়তনে এক আলোচনা সভার আয়োজন করা হয়। আলোচনা সভায় প্রধান অতিথি ছিলেন মহিলা ও শিশু বিষয়ক প্রতিমন্ত্রী মেহের আফরোজ চুমকি। সূত্র-ইত্তেফাক (পৃ.৩,ক.২), সংবাদ (শেষ পৃ.,ক.২), ইনকিলাব (শেষ পৃ.,ক.৩), ডেইলি সান (পৃ.২,ক.২), নিউজ টুডে (পৃ.৩,ক.৬)।

৯। সারাদেশে শিশুদের খাওয়ানো হল ভিটামিন ‘এ’ গ্লাস ক্যাপসুল

সারাদেশে ২ কোটি ১৪ লাখের বেশি শিশুকে খাওয়ানো হয়েছে ভিটামিন এ গ্লাস ক্যাপসুল। ক্যাম্পেইনে ৬ থেকে ১১ মাস বয়সী শিশুকে একটি নীল রঙের ভিটামিন ‘এ’ ক্যাপসুল এবং একবছর থেকে পাঁচ বছরের কম বয়সী শিশুদের একটি লাল রঙের ভিটামিন খাওয়ানো হয়। সারাদেশে ১ লাখ ২০ হাজার স্থায়ী কেন্দ্রের সঙ্গে আরও ২০ হাজার ভ্রাম্যমাণ কেন্দ্রে এ সেবা কার্যক্রম পরিচালিত হয়। প্রতিটি কেন্দ্রে কমপক্ষে ৩ জন প্রশিক্ষিত সেচ্ছাসেবী দায়িত্ব পালন করেন। গতকাল ১৪ নভেম্বর শনিবার সকাল ৮টা থেকে শুরু হওয়া জাতীয় ভিটামিন ‘এ’ গ্লাস ক্যাম্পেইন কার্যক্রম চলে একটানা বিকাল চারটা পর্যন্ত। সূত্র-ইত্তেফাক (পৃ.৩,ক.১), প্রথম আলো (পৃ.২,ক.৮), যুগান্তর (পৃ.৩,ক.১)।

১০। নির্বাচনী সমস্যার শান্তিপূর্ণ সমাধানে পাশে থাকবে যুক্তরাষ্ট্র : মার্কিন রাষ্ট্রদূত

দেশের নির্বাচনী সব সমস্যার শান্তিপূর্ণ সমাধানে যুক্তরাষ্ট্র সবসময় বাংলাদেশের পাশে থাকবে বলে জানিয়েছেন বাংলাদেশে নিযুক্ত রাষ্ট্রদূত মার্শা বার্নিকাট। তিনি বলেছেন, নির্বাচনী সহিংসতা সংক্রান্ত সমস্যাগুলোর সমাধান রাতারাতি হবে না। শান্তির দূত হিসেবে সহিংসতাবিহীন ভবিষ্যৎ নির্বাচনের স্বপ্ন দেখার মাধ্যমে সমাজে আপনারা ইতিবাচক উদাহরণ হয়ে থাকবেন। মনে রাখবেন, সমস্যার শান্তিপূর্ণ সমাধান খুঁজে পেতে যুক্তরাষ্ট্র সরকার ‘ইউএসএআইডি’র মাধ্যমে আপনাদের পাশে রয়েছে। গতকাল ১৪ নভেম্বর শনিবার কৃষিবিদ ইনস্টিটিউট কনভেনশন সেন্টারে ‘পিস অ্যান্ডসেডরদের’ ন্যাশনাল কনভেনশনে প্রধান অতিথির বক্তব্যে তিনি এসব কথা বলেন। সূত্র-সংবাদ (শেষ পৃ., ক.১), জনকর্ষ (শেষ পৃ.,ক.৫), যায়যায়দিন (পৃ.১,ক.২)।

সম্পাদকীয়

ক. প্রথম আলো, ইত্তেফাক, সংবাদ, সমকাল, যুগান্তর, ডেইলি স্টার, ইন্ডিপেনডেন্ট, ডেইলি সান, নিউজ টুডে, ডেইলি অবজারভার : ফ্রান্সের রাজধানী প্যারিসে সন্ত্রাসীদের হামলায় ১২৭ জন নিহত হওয়ার ঘটনায় শোক প্রকাশ করে প্রধানমন্ত্রী শেখ হাসিনা সন্ত্রাসবাদ ও সহিংস উগ্রবাদের বিরুদ্ধে লড়াইয়ে ফ্রান্সের সঙ্গে কাজ করার যে অঙ্গীকার ব্যক্ত করেছেন তাতে একাত্মতা প্রকাশ;

- খ. জনকণ্ঠ : ভারতের বিচ্ছিন্নতাবাদী সংগঠন উলফার সাধারণ সম্পাদক অনুপ চেটিয়া ও বাংলাদেশের আলোচিত সেভেন মার্চারের অন্যতম আসামী নূর হোসেনের স্থানান্তর প্রক্রিয়ার মাধ্যমে শান্তিপূর্ণ ও সফল হস্তান্তর সম্পন্ন হওয়ায় স্বস্তি প্রকাশ করে এতে দুই দেশের নেতৃত্বের সম্মতি বিরোধী মনোভাব ও ন্যায়বিচারের প্রতি অঙ্গীকারেরই প্রতিফলন ঘটেছে বলে মন্তব্য;
- গ. সংবাদ : রাজস্ব, আয়কর ও শুল্ক আদায়ে এনবিআরের কর্মপদ্ধতি আধুনিক ও যুগোপযোগী করার ওপর গুরুত্বারোপ;
- ঘ. সমকাল : শহরাঞ্চলে ডায়াবেটিসের প্রকোপ বেশি থাকলেও গ্রামাঞ্চলেও মহামারী আকারে ডায়াবেটিস ছড়িয়ে পড়ছে উল্লেখ করে এ ব্যাপারে চিকিৎসা ব্যবস্থা সম্প্রসারণের পাশাপাশি সামাজিক সচেতনতা বাড়ানোর আহ্বান;
- ঙ. ইনকিলাব : বিদেশের হাসপাতালে ব্যবহার করা সিরিজ ও স্যালাইন সেট রিপ্যাকিং করে বাংলাদেশে বাজারজাত করা হচ্ছে উল্লেখ করে একশ্রেণির অসাধু ব্যবসায়ী এগুলো আমদানি ও বাজারজাতকরণের সাথে জড়িত হওয়ায় এ ব্যাপারে কঠোর পদক্ষেপ নেওয়ার দাবি;
- চ. ইন্ডিপেনডেন্ট : দেশে উৎপাদিত তুলার অধিক ব্যবহার গার্মেন্টস খাতকে আরো সক্ষম করে তোলার পাশাপাশি বৈদেশিক মুদ্রারও সাশ্রয় করবে বলে প্রত্যাশা;
- ছ. ডেইলি সান : আলুর মূল্য সহনীয় রাখার পরিবর্তে সরকারের আলু আমদানির সিদ্ধান্ত আলু চাষিদের দুর্ভোগ বাড়াবে বলে আশঙ্কা প্রকাশ;
- জ. নিউ নেশন : প্রাথমিক শিক্ষা সমাপনী পরীক্ষার প্রশ্নপত্রে ভুল থাকায় ২০১৪ সালে ইংরেজি ও অংক পরীক্ষার ফলাফল আশানুরূপ না হওয়ার তথ্য উল্লেখ করে শিক্ষক নিয়োগের সময় যোগ্যতা ও মেধার মূল্যায়ন করার ওপর গুরুত্বারোপ;
- ঝ. নিউ এজ : পরিবেশ দূষণকারী অননুমোদিত ইটভাটার মালিকদের বিরুদ্ধে যথাযথ কর্তৃপক্ষকে কঠোর আইনি ব্যবস্থা গ্রহণের সুপারিশ
- ঞ. ফিনানশিয়াল এক্সপ্রেস : সামাজিক নিরাপত্তা খাতের সরকারি তহবিলের অপব্যবহার প্রতিরোধ করাসহ ২০১৮ সালের মধ্যে দেশের দরিদ্র জনগোষ্ঠীকে জাতীয় সামাজিক নিরাপত্তা নেটওয়ার্কে আনার টাগেটের সাফল্য কামনা করে সম্পাদকীয় প্রকাশ করেছে।

উপ-সম্পাদকীয়

সংবাদ পত্রিকায় প্রকাশিত কলামে উদীয়মান মধ্যবিত্ত অর্থনীতি ও সামাজিক ক্ষেত্রে নাগরিক চেতনাকে বিকশিত করবে বলে উল্লেখ করা হয়েছে।

নিবন্ধ ও ফিচার

ইন্ডেক্স পত্রিকায় প্রকাশিত 'অপরিবর্তিত সেলফোন টাওয়ার : প্রজন্মের হুমকি' শিরোনামের নিবন্ধে হারুন-অর-রশিদ সেলফোন টাওয়ার বসানোর নিয়মনীতি অনুযায়ী একই এলাকায় সর্বাধিক কতটা ও কত উচ্চতায় টাওয়ার বসানো নিরাপদ তা কঠোরভাবে মেনে চলা উচিত বলে অভিমত প্রকাশ করেছেন।

#

ফারহানা/ফাহিমা/মরজিনা/সাদ্দা/বিপু/২০১৫/৯.০০ ঘণ্টা